

# INUIT ATAQATIGIIT INATSIARTUNI



UKA2026/232

25. september 2025

Paarma Lund Kreutzmann

## **Inuit innarluutillit tapersorneqarnissaannut Inatsisartut inatsisaat**

### **Peqqissutsimut inunnnullu Innarluutilinnut Naalakkersuisoq**

Inuit Ataqtigii inuit innarluutillit atugarisaat pillugit ukiorpassuarni suleqataaffigisimasatta ilaat manna sammeneqalermat iluarisimaarparput. Nalunngilarput nunatsinni inuit innarluutillit aammalu innarluutilinnut ilaqutaasut atugarisaat assut pitsanngorsagassaasut.

Taamaammat pitsaasutut isigaarput inuit Innarluutillit pillugit Inatsisartut inatsisissaattut siunnersuut manna Naalakkersuisuniit kiisami qaqinneqarmat. Tamanna ersiutaavoq naalakkersuinikkut aamma inuiaqatigiinni innarluutilittatta politikikkut iliuuseqarfigineqarnissaat aallartittoq.

Inatsisissatut siunnersuummi iluarisimaarparput ilaqutaasut qanigisaasullu innarluutilimmik paaqqutarinnissinnaalernissaannik periarfissiiniartoqalermat. Naqissuserusupparpulli pingaartikkatsigu innarluutilinnik paaqqutarinnittussat piginnaasaannik pitsaasumik qulakkeerinninnissamik siunertat erseqqinnerusut amigaatigigatsigit.

Pikkorissaanerit inunnut innarluutilinnut sulisunut pisariaqartussaapput, aamma innarluutillit pisinnaatitaaffii pillugit illersorniarlugillu ilisimasat sulisunut piumasaqaataasussaapput. Taamaanngippammi unioqqutitsisoqannginnissaa siunertaralugu pisortaq iliuuseqarsimannginnerat naammassineqarsimassanngimmata.

Piumasaraarput Naalakkersuisunit erseqqissarneqassasoq kinguaassiuutitigut atornerluisoqannginnissaa allatigulluunniit unioqqutitsisoqannginnissaa qulakkeerniarlugu iliuusissat suut innarluutilinnut sullissisunngortussanut nutaanut iliuuserisarniarneraat paasisaqarfigissallutigu. Inuit innarluutillit illersorniarlugit sulisussat qulaajaaffigineqartarnissaat, kinguaassiuutitigut atornerluisimannginnissaa qulakkeerneqartariaqarmat.

Pingaartutut isigaarput isigiarsuttut aammalu tusilartut pillugit sulinermi kissaatit aamma tusaaniarneqassasut. Taakku kissaatigaat pisortanut saaffiginniffissaq "matu" ataaseq pilersinneqassasoq. Tassa inuit innarluutillit pillugit kiffartuussivik pisariaqartinneqarpoq. Pisortanut saaffiginnikkaangamik sumut tamaanga saaffiginniffissanut innersuunneqattaartarnertik assut iluarinngilaat. Saaffiginnittarfinni sulisut tusilartunut tappiitsunullu kiffartuussinissaminnut piginnaasaat killeqarsinnaasarnerat pissutigalugu.

Inatsisissatut siunnersuummi paaserusupparput innarluutilinnut ilaqutaasut qanigisaasulluunniit paarsinermi akissaatigut ilumut naammattumik akissarsiaqartinneqarniarnersut. Apeqquut taanna partiit allat Naalakkersuisullu peqatigalugit eqqartorusupparput. Pingaaqimmat sulisut aalajaatsut ataavartumik pigiuarinissaat siunertarineqassasoq, akissarsiat naammattumik annertussuseqartinnissaat. Taamaammat siunnersuut peqqissutsimut ilaqutariinnut ataatsimiititaliamut ingerlateqqinneqarnissaanut innersuupparput.

Qujanaq.